

շփոթուած կեանքից յետոյ՝ նորան դարձեալ տեսնել բարեկարգ և իրեն վայել վիճակում, ամենքի տենչն է։ Յանկանք, որ նկատուած լաւ նշանները աւելի ևս զարգանան և յարատեւ լինին։

Անցեալ համարում յայտնել էինք, որ Կարապետ ծ. վարդապետն ընտրուած է միաձայն Ատրպատականի առաջնորդ։ Հոկտեմբերի 23-ին Թաւրիզի պատգամաւորների հետ ճանապարհ ընկաւ նա իւր նոր պաշտօնատեղին։

Ս. Հայրապետի մահուամբ անկարելի է այժմ իրադարձել «Արարատը» շաբաթաթերթ դարձնելու միտքը, որի մասին հաղորդել էինք անցեալ անգամ։ Այդ խնդիրը կմնայ նորընտիր Հայրապետի տնօրէնութեամբ լուծել։ Սակայն էջմիածնում խմբուած գրական ուժերը՝ միաբանութիւնից և ճեմարանի ուսուցչական խմբից՝ կաջակցեն թերթիս յառաջադիմութեան։ Եկող յունուարից «Արարատը» կհրատարակուի երկու բաժնով. ա) պաշտօնական—կրօնական—եկեղեցական, և բ) գրական—բանասիրական—մանկավարժական։ Բացի հեռու և մօտ հին աշխատակիցներից՝ անմիջապէս կմասնակցեն հ. հ. Յուսիկ, Երուանդ և Լեօն վարդապետները, միաբանը, իսկ ճեմարանի ուսուցիչներից պ. պ. Բերբերեան, Արեղեան, Յ. Յովհաննիսեան, Յ. Պետրոսեան, Խոստիկեան, Սամուէլեան և Մնացականեան, ինչպէս և պ. Կ, Մելիք—Շահնազարեան՝ Տմբլաչի Խաչանը։

Ս. Սինոդը Օր. XI. հատ. I մ. 1119 և 1120 յոգուածների համաձայն նոր կաթողիկոսի ընտրութեան օրը նշանակելով 1908 թ. հոկտ. 30-ին, ծանուցողական հրովարտակներ է ուղարկել Ռուսաստանի և արտասահմանի Հայոց բոլոր թեմերին։ Ռուսաստանի առաջնորդներին Սինոդն ուղարկել է ծանուցագրերն անմիջապէս, իսկ արտասահմանի թեմերին Տ. Փոխարքայի դիւանի միջո-

ցաւ, համապատասխան գեաղանականների ձեռքով տեղ հասցնելու: Ս. Սինոդը իւր այս կարգադրութիւնն արել է հետեւողութեամբ ի Տէր հանգուցեալ Մակար և Մկրտիչ կաթողիկոսների ընտրութեան և համաձայն Կովկասի քաղաքական մասի կառավարչապետի դրութեան ի 25 հոկտ. 1891 թ., Արտասահմանի թերթերից ծանուցողական հրովարտակներ ուղարկուած են Կ. Պօլսոյ և Երուսաղեմի Ամենապատիւ Պատրիարքներին, Կիլիկիոյ Տան Վեհաշնորհ Կաթողիկոսին, Աղթամարայ կաթողիկոսական տեղապահին և Թուրքիոյ ու Բուլղարիոյ բոլոր առաջնորդներին, ինչպէս և Ատրպատականի, Պարսկաստանի ու Հնդկաստանի առաջնորդներին: Մի առանձին դրութեամբ էլ Ս. Սինոդը հաղորդելով Տ. Փոխարքային, Արևմտեան Եւրոպայի և Ամերիկայի երկու նոր թեմերի հաստատման մասին, հարցնում է, արդեօք նորա կողմից արգելք չկայ Սինոդից ծանուցողական հրովարտակներ ուղարկելու, ինչպէս միւս թեմերին է ուղարկուած:

Իւրաքանչիւր թեմից, ինչպէս յայտնի է, ուղարկուում է երկու պատգամաւոր՝ տեղւոյն առաջնորդը հոգեւորականութեան կողմից և մի աշխարհական պատգամաւոր ժողովրդի: Ռուսաստանի թեմերը 6 են: Բայց Աստրախանի թեմը այժմ առաջնորդ չունի, իսկ օրէնքի մէջ պարզ ասուած է, որ ծանուցողական հրովարտակներն ուղղուած են թեմակալ առաջնորդների անուան և նա պիտի լինի պատգամաւոր, կամ ում կնշանակէ իւր կողմից, Սինոդը օրագրական յատուկ սրոշմամբ դիմեց ներքին դործոց Տ. նախարարին և նորա հրահանգութիւնը խնդրեց, թէ ծանուցողական հրովարտակը ո՞ւմ անունով ուղղէ այդ թեմի համար: Մի մի ձայն ունին Սինոդի անդամները՝ ներկայ դէպքում հինգ ձայն: Էջմիածնի միաբանութեան կողմից 7 ձայն՝ որ ստանում են աւագագոյն անդամներն առանց ընտրութեան, Թուրքիայի թեմերը 49 են հաշուած՝ մէջն ընդունելով Երուսաղեմի և Կ. Պօլսոյ պատրիարքական թեմերը, ինչպէս Կիլիկիոյ և Աղթամարի կաթողիկոսների թեմերը: